

Pinadesi, CHinátsaga, Hinemlo' yan Pås
Tinige' Rosa Salas Palomo
Fibreru 2021

Pinadesi, CHinátsaga, Hinemlo' yan Pås.

Tinituhon gi i dos mit bente gi i Måtso i hinatmen i peste Covid-19 gi i tano'-ta.
Despásiónñaihon i minalángu yan finatai gi i manlátaftaf na mes siha.
Despues di i tiempom somnak mampos ha tátme hit ya meggai na minalángu yan finatai.
Ogga'an, talo'áni, puengi, tátalo' puengi, yan chatangmak.

I Pinadesi

Ta padédesi i peste Covid-19 nu atdet yan tåya' ánte-ña.
Tåya ha eskókohi – parehu manámko', manhoben, manmalángu yan mambrábu.
Ta pongle hit gi i gimá'-ta, ta bossat i pachot-ta yan gui'eng-ta, yan sesso ta fa'gâsi i kannai-ta.
Manmapribini hit na u ta fanábista yan todú i tiempo ta fansais pie na destânsia.
I etmás na'piniti na pinadesi i ti sumiña hit bumisita i malangu-ta yan humáfot i matai-ta.

I CHinátsaga

Manmahuchom i eskuela, fañe'cho'an, guma' Yu'os, gubietnamento, yan tenda siha.
Ya ti u fanmababa astaki tumungokñaihon i minalángu yan finatai ginen i peste.
Ya annai mababa i tenda yan bångko siha ná'manman sa' gof anákkó' na fila.
Manmalingu cho'cho' palu gi i taotao-ta yan kontodu palu i liheng-ñiha,
Tåya' cho'cho', tåya' saláppe', tumåya'ñaihon lokkue' liheng yan néngkanno' siha.

I Hinemlo'

Mañásaonao médiku, emfetmera, mamfáfa'che'cho' espitát, polisaha, sendálu yan taotao kimason, I Méggagai na taotao manná'huyong bossat, makloráksi na saosao, yan hånóm atkahót.
Motmot na minalángu gi i dos espitát ya ti numahong kátre yan mákinan humágon.
Mansen yáfai i maná'amte siha – ti nahong kånnai lao sigi ha' mo'na kada ora yan diha
Astaki dumespásiónñaihon i minalángu yan finatai yan manmabakuna i taotao siha.

I Pås

CHinacháláni este nu i manmababan i gima' Yu'os para u ta fanhosme misa.
Manmababa lámeggai na bisnes, setbision gubietnamento, tenda, yan eskuela,
Manungokñaihon i minalángu yan finatai yan lumibrenñaihon i dos espitát-ta.
Guaha inayudan néngkanno', saláppe', ginima', yan Covid-19 testing,
Sen sinague lokkue' nu i ma'apreban finatto, yan binakunan Covid-19.

Pinadesi, CHinátsaga, Hinemlo' yan Pås.

Hunggan, magáhet, gof makkat i maloffan na sákkan bente bente
Lao, komu taiguihi yanggen mampinakyó hit atdet pat ha fána' hit háfa na ira,
Siempre manmanáyuyot, manmanosge, manmesngon, yan maná'ayuda.
Sa' metgot i tinangá-ta yan hinengge-ta gi as Saina-ta na u funas i Covid-19!